

სსიპ - საქართველოს ეროვნული არქივის მკვლევართა დარბაზში

დაშვებულ პირთა ქცევის წესი

მუხლი 1.

1. სსიპ - საქართველოს ეროვნული არქივის (შემდეგში - ეროვნული არქივი) მკვლევართა დარბაზში პირის დაშვების ერთ-ერთ პირობას წარმოადგენს წინამდებარე „სსიპ - საქართველოს ეროვნული არქივის მკვლევართა დარბაზში დაშვებულ პირთა ქცევის წესის“ (შემდეგში - ქცევის წესი) გაცნობა და ამ ქცევის წესის დაცვის დადასტურება ხელმოწერით.
2. ქცევის წესი ვრცელდება ეროვნული არქივის ყველა მკვლევართა დარბაზზე და მკვლევართა დარბაზში დაშვებულ პირზე.

მუხლი 2. მკვლევართა დარბაზში დაშვებული პირის ვალდებულება

დაშვებული პირი ვალდებულია:

1. ეროვნული არქივის შენობაში ყოფნისას დაიცვას ეროვნული არქივის მიერ დადგენილი ნორმები და ქცევის წესი;
2. მკვლევართა დარბაზში შესვლა-გამოსვლა დააფიქსიროს ელექტრონულ ტექნიკურ საშუალებაზე (ასეთის არსებობის შემთხვევაში) საშვთა ბიუროს მიერ გაცემული ელექტრონული საშვი-ბარათით;
3. იყოს კეთილგანწყობილი როგორც ეროვნული არქივის თანამშრომლის, ასევე სხვა დაშვებული პირის მიმართ;
4. ეროვნული არქივის შენობაში დაიცვას წესრიგი, საზოგადოებრივი ქცევისა და ჰიგიენის ნორმები;
5. მკვლევართა დარბაზში მობილური ტელეფონი იქონიოს უხმო მდგომარეობაში;
6. გაუფრთხილდეს და პასუხისმგებლობით მოეკიდოს ეროვნული საარქივო ფონდის დოკუმენტებს, ეროვნული არქივის ინვენტარსა და სხვა ქონებას;
7. გადაიხადოს მომსახურების საფასური „საქართველოს იუსტიციის სამინისტროს მმართველობის სფეროში მოქმედი საჯარო სამართლის იურიდიული პირის - საქართველოს ეროვნული არქივის მიერ გაწეული მომსახურებისათვის დაწესებული საფასურის ოდენობების, გადახდის წესისა და მომსახურების ვადების დამტკიცების შესახებ“ საქართველოს მთავრობის 2011 წლის 29 დეკემბრის N506 დადგენილების შესაბამისად.

მუხლი 3. მკვლევართა დარბაზში დაშვებული პირის უფლებამოსილება

დაშვებული პირი უფლებამოსილია მოსთხოვოს ეროვნულ არქივს:

1. გაუწიოს მომსახურება „ეროვნული საარქივო ფონდისა და ეროვნული არქივის შესახებ“ საქართველოს კანონის, „პერსონალურ მონაცემთა დაცვის შესახებ“ საქართველოს კანონისა და „საქართველოს იუსტიციის სამინისტროს მმართველობის სფეროში მოქმედი საჯარო სამართლის იურიდიული პირის - საქართველოს ეროვნული არქივის მიერ გაწეული მომსახურებისათვის დაწესებული საფასურის ოდენობების, გადახდის წესისა და მომსახურების ვადების დამტკიცების შესახებ“ საქართველოს მთავრობის 2011 წლის 29 დეკემბრის N506 დადგენილების შესაბამისად;
2. შეუქმნას ჯანსაღი სამუშაო გარემო.

მუხლი 4. მკვლევართა დარბაზში დაშვებული პირის მიმართ მოქმედი აკრძალვა

დაშვებულ პირს ეკრძალება:

1. კატალოგიდან/კარტოთეკიდან ბარათის ამოღება;
2. მკვლევართა დარბაზში საკვების ან/და სასმელის შეტანა;
3. ხმამაღალი საუბარი (მათ შორის ტელეფონზე) ან ნებისმიერი სხვა ქმედება, რომელიც დაარღვევს სამუშაო გარემოს მკვლევართა დარბაზში ან/და ეროვნული არქივის შენობაში;
4. სამუშაო მაგიდასთან ჩანთის ან/და ხელბარგის განთავსება (აღნიშნული ნივთები უნდა მოთავსდეს სპეციალურად გამოყოფილ ადგილას). დაშვებულმა პირმა თან უნდა იქონიოს ფული და სხვა ძვირფასი ნივთი. აღნიშნული ნივთების დაკარგვის შემთხვევაში ეროვნული არქივი პასუხს არ აგებს;
5. ეროვნული არქივის შენობაში თამბაქოს ან მისი ელემენტის შემცველი ნაწარმის (მათ შორის ელექტრონული სიგარეტი) მოხმარება;
6. არასათანადო მდგომარეობაში ყოფნა;
7. მკვლევართა დარბაზში მობილური ტელეფონის გამოყენება;
8. საარქივო დოკუმენტის ასლის, ფოტოსურათის, ვიდეოს გადაღება;
9. საარქივო დოკუმენტის ფიზიკური დაზიანება, შინაარსის გაყალბება, დოკუმენტის დედანში აღნიშვნის გაკეთება.

მუხლი 5. პასუხისმგებლობა

ეროვნულ არქივს უფლება აქვს დადგენილი ნორმებისა და ქცევის წესების დამრღვევ პირთა მიმართ, დარღვევის სიმძიმის შესაბამისად, მიიღოს შემდეგი ზომები:

- ა) მისცეს გაფრთხილება ან/და დაუყოვნებლივ დაატოვებინოს მკვლევართა დარბაზი;
- ბ) დაატოვებინოს მკვლევართა დარბაზი ერთ წლამდე ვადით;
- გ) მიმართოს სამართალდამცავ ორგანოებს.